



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 8

Jaishankar-i Bodhbarnü  
Kuwait semdangtsü

Sorkar tasen atema Israel  
parliament nung Deobarnü vote agitsü



VOL. XVIII NO. 235 (ADOK 235) DIMAPUR

RASEMNÜ (WEDNESDAY)

AAMI (JUNE) 09, 2021

₹ 5.00

## ABAM tenzüker kibongtemi COVID Hospital semdang

**Dimapur, June 8, 2021 (TYO):** ABAM nung tenzüker kibongtemi pei akokba tenla bendener Mokokchung nung COVID-19 agi shiranga alirtem aser medical staff nem June 8, 2021 nung chiyungtsu lemsatepogo.

Iba den parnokisa shirangertem nem temang tashi aittsü atema tapet chiyungtsü agütsü. COVID-19 agi shirangertem aser Medical staff atema sarasademtsüba mapang

ABAM Executive Secretary, Rev. Dr. Mar Pongener-i "Tanü COVID-19 ajanga meimchirtem kanga timtemdaksür, saka Tsüngrem shibai ajak asoshi tajung inyaker, pa dak teimla yur iba wara koktettsü" ta ayongzüka liasü.

Rev. Dr. Mar-isa medical staff temi anibelem arema shirangertem anepaluba asoshi pelaba metetdaksüba den parnok nem tenüngsang agütsü.



**Dimapur Ao Baptist Arogoi Imkongliba memorial district hospital Mokokchung nung amshitsü atema oxygen cylinder 10 aser Impur Mission Hospital atema oxygen cylinder 15 tenla agütsüba noksa nung angur. Iba dakji alaka DABA-isa Dimapur nung Covid mozü 6 nung oxygen cylinder 75 tenla agütsüogo. (June 8,2021)**

## Advisor Tovihoto-i COVID-19 atema itasen tenlar

**Dimapur, June 8, 2021 (TYO):** Mongulbarnü MLA aser Power Department Advisor, Tovihoto Ayemi-i Dimapur District Task Force den senden ka menogo.

Senden nung Advisor, Tovihoto-i Dimapur nung COVID-19 anema rara nung amshitsü atema pa indang ita ka itasen DTF nem tenla agütsü.

Iba senden nung Dimapur DC Rajesh Soundarajan IAS aser Nodal Officer Kikheto Sema IAS nati anir ketdangsurtem aden.

Senden nung Advisor, Tovihoto-i district ketdangsurtem den Covid osang tejangja metetpela aser mapang shitak nung mapa inyaksü ayongzüok.

## NSF-i stationery & book stores lapoktsü mepir

**Dimapur, June 8, 2021 (TYO):** Nagaland nung total lockdown mapang stationery aser book stores lapoktsüla ta Naga Students' Federation (NSF)-i state sorkar dang mepishia metetdaksüogo.

Item dokantem lapokba ajanga kaketshirtemi teyari nüngdabatem angutsü, ta NSF tir Kegwayhun Tep aser tongti tezülur Supuni Ng Philo nati sangdong ka nung ashi.

NSF-isa state sorkar dang COVID-19 indang senotsü timi amshitsü metetdaksüogo.

Parnokisa Naga nunger longjemtsü aser Indo-Naga yimten ken o angateteptsü atema Naga Political Groups (NPGs) aser Civil Society Organisations

(CSOs) külemi mener tebilemba lemsateptsü ayongzüko.

Tanü Nagaland nung e-governance kanga nüngdaker kechiyong iba ajanga sorkar ketdangsubaren nung tashishitsü melii inyaksangshitetsü, ta NSF-isa metetdaksü.

NSF-isa Nagaland Staff Selection Board (NSSB) mapa küma tenzüksü mepishiogo. "State sorkari Nagaland nung tekaratiba nung reservation policy meyipa repringshitsüla" ta parnok i ashi.

Yaküm October 18 nung sorkar den tenangzüktep nung sign sütepbä ama SSA aser RMSA tesayurtem indang mapa inyaksüla, ta NSF-isa nenshia metetdaksü.

## Mkg Police-i gari auyar telok nungi nisung 7 apu

**Dimapur, June 8, 2021 (TYO):** Mokokchung Police-i district balala nung gari auya ayokba telok ka puogo aser parnok ket nungi gari 10 ngutetogo.

Iba dak sendakba nung nisung 7 pua lir, ta Mongulbarnü Superintendent of Police, Mokokchung-i sangdong ka nung metetdaksü.

Mokokchung jila kübok Aongza ward nung May 25, 2021 ayaterm nung nisung kati motorcycle ka auyar jena aotsü merandang apu aser iba sülen bushisüngdanga arudang nisung 7 apu.

Iba tatalokba atema ken o benoker bushisüngdanga arudang auer telok jagi inyakyim balala ajanga garitem auyaba bushitet.

DEF Wokha teyari agia Wokha nung nisung 4 aser Mokokchung nung nisung 2 apu, ta Mokokchung Police-isa ashi.

Parnokji Chukitong, Wokha nung alirtem Nzubemo (29 yrs) aser Nchumbemo (27 yrs), Tsumang 'A' Colony, Wokha nung alir Amos (41 yrs), Aongza Ward, Mokokchung nung alir Kumar Chetri (35 yrs), Pongidong, Wokha nung alir Phyobemo (34 yrs) aser Artang ward, Mokokchung nung alir Imnalemba (28 yrs) nunger lir.

Parnok ket nungi gari 10 (Gypsy 2, Alto 3, Maruti 800 3 & Motorcycle 2) tashi ngutetogo. Wokha nung gari 9 aser Mokokchung nung gari ka angu.

## COVID-19 Nagaland: Anogo asembuba taneptsü angur timba

**Kohima, June 8, 2021 (TYO):** Nagaland nung tanü agi anogo asembuba COVID-19 puteter dang nungibo taneptsü angur timba liasü.

Mongulbarnü COVID-19 puteta alir nisung 153 taneptsü angur aser 133 dak putet. Tanü puteterem züngsema nisung ajak agi 23,000 adenogo aser nisung 432 süogo.

"Tanü nisung 133 dak COVID-19 aliba putet. Parnokji Dimapur nung 36, Mokokchung nung 28, Wokha nung 27, Kohima nung 16, Mon nung 8, Phek nung 7, Longleng nung 5 aser Kiphire o Zunheboto nung asemsem (3)" ta Integrated Disease Surveillance Project atema State Nodal Officer, Dr Nyanthung Kikon-i ashi.

Tanü puteterem züngsema nisung ajak agi 23,051 kümogo,

ta paisa ashi.

"Maneni tanü COVID-19 puteta alir nisung 153 taneptsü angur. Parnokji Dimapur nung 46, Mokokchung nung 37, Tuensang nung 28, Zunheboto nung 9, Kohima o Longleng nung tenetnet (7), Phek nung 6 aser Wokha nung 3 lir. Parnok züngsema nisung 17,296 taneptsü nguogo" ta Dr Kikon-isa ashi.

Nagaland nung COVID-19 nungi taneptsü angurji 75.03% lir aser tang nisung 4,676 anepaludar, ta paisa metetdaksü.

Mongulbarnü COVID-19 puteta alir nisung 3 asü. Parnokji Kohima aser Mon nung kaka liasü. Tena züngsema tasür ajak agi 432 kümogo saka nisung 14 bo tanga tashidak ajanga asü, ta Dr Kikon-isa ashi.

Nagaland nung COVID-19 alitsü akok ta temolung melemi

bilemba sample 2,01,474 tendangogo. RT-PCR ajanga 92,274, TrueNat ajanga 57,355 aser Rapid Antigen Test ajanga 51,845 tendang.

"Hombar tashi nung nisung 2,43,551 nem COVID-19 vaccine indang dose 2,97,799 agütsüogo" ta State Immunization Officer, Dr Ritu Thurr-i ashi.

Vaccine agirtemji frontline workers 58,930, healthcare workers 15,609, arishi küm 45 ser temapur 1,24,861 aser arishi küm 18 nungi 44 tsüngda alir 44,151 lir.

"Vaccine agirtem rongnungi nisung 54,248-i vaccine indang dose anaprong agiogo. Parnokji frontline workers 28,033, healthcare workers 10,202 aser arishi küm 45 ser temapur 16,013 lir" ta Dr Thurr-isa metetdaksü.

## NSF aser NSCN-IM-i Karbi Accord ashishir

**Dimapur, June 8, 2021 (TYO):** Assam kübok Karbi Anglong tesem nung telungpur telok 6-i iba tesem nung alir Naga nunger den asüngdangya mesüi India sorkar den tezüngzüktep ka agitsü osang angashia aoksar ta Naga Students' Federation (NSF)-i metetdaksü.

Telok balalai ozüng alema inyakba anentsü aser tarutsü atema lenmang yanglutsü merangba atema tenüngsang agütsür saka iba inyakyim ajanga Naga lima talila lemsatsü. Iba tesem nung chichiba lisopurtemji Naga nunger lir saka olemtep nungbo madener, ta NSF-i ashi.

"NSF-i Naga nunger temeten atema maneni inyaksü aser ozü lima ka küma lokteptsü merangtsü. Anungji Karbi Anglong

nung Naga nunger medeni yimjung tezüngzüktep agibaji magizüker. Maneni, iba tesem nung aliba Naga nunger shingaiia tezüngzüktep agiba mesüra iba dak sendakba sentongtem nung shilem magitsü metetdaksür" ta ta NSF tir Kegwayhun Tep aser tongti tezülur Supuni Ng Philo nati sangdong ka nung ashi.

Hombarnü NSCN-IM-ia Centre, Assam sorkar aser Karbi telungpur 6 tsüngda Karbi Accord sign asüba magizüker ta metetdaksüogo.

Karbi Accord ya tan hopta sin süteptsü ta tawa tu Assam Chief Minister Himanta Biswa Sarma-i metetdaksüogo.

"Rengma Naga nunger nem timtem bentsür aruba

tenangzüktep kecha magizüksü. Rengma Naga nunger ya Karbi Anglong (taoba Rengma Hills) nung chichiba lisopurtem lir aser putiotsü kuli tejangja yutsür Rengma Naga nunger tia tamajungi meyokdaksütsü" ta NSCN-IM-isa metetdaksü.

India sorkar den yimjung olemtep nung Assam nung Rengma nunger tebilemstü ya tongtipang onük ka lir aser Naga nunger ali tangar nem agütsüba ya magizüker, ta parnokisa ashi.

Centre aser Assam sorkartemi iba yimjung tenangzüktep sign asüba ya temai adokba Karbi telungpur telok 6 peladaksütsü atema inyakba mapa ka dang lir, ta NSCN-IM-isa metetdaksüogo.

## Covid putetaka meshirangertem pei kidang takdang balaka nung mongdaksür, idangji -

Pei alidak aser ayipdak mopong aittsüsa kichiba (window & ventilation) lapoka yuang.

Akok tashi süngjanglijang aser süngolemba agi tua chiyongtsü tajung chiang aser tzü aser juice jemang.

Pei meyong mobile phone, kumesü aser toothbrush nunger ama melentepa tamshi.

Mozü achitsü agüja lira, aji shitak chiang.

Tango junga mesashitetba, teku ashiba, aketba aser temang metaba timtem lira yakta doctor bushiang.



Tir Yimiyim



### Mongsenyimti PHC atema ambulance ka meshitet



Minister Tongpang Ozukum den Mongsenyimti PHC ketdangsürtem, Mongsenyimti putu menden züngsemtem aser Limala EAC, Chuchuyimlang Circle nungertem tangokba noksa ka yangi angur.

**Dimapur, Aami/June 08 (TYO):** Mongsenyimti Primary Health Centre atema ambulance ka Pastor, Mongsenyimti compound Baptist Church, Rev. Imti Ozukum ajanga Minister, PWD, Housing & Mechanical, Tongpang Ozukum lia June 8, 2021 nü Mongsenyimti nung meshiteta liasü.

Iba sentong nung jembiba mapang, PHC kübok ambulance amshiba ya ajanga PHC küboki aitba temeket nung aliba yimtsüngtema kanga

ajanzüksü, ta Medical Officer, Dr. Rachel ajanga ashi.

Ambulance ka bendenlokba yagi talisa COVID-19 agi shiranger anir senzüba nunga tajanzük tali agütsüsü, ta laisa ashi.

Tang tashidak wara agi tesem ajunga nung timtem balala agütsüba mapang nüburtem nungdakba ajiteta ambulance agütsüba atema Health & Family Welfare minister aser Medical department dang kanga pelar,

ta sentong nung Minister Tongpang Ozukum-i ashi.

Iba ambulance ya Mongsenyimti PHC kübok aliba yimtsüngtem asoshi alinung, PHC management team aser Mongsenyimti putu menden lungjemer nübur ajunga ajanzüksü atema kanga kumdanga aser tajungtiba nung amshitsü imlar, ta Minister Tongpang Ozukum-i ashi.

Paisa putu menden aser PHC management team dang maneni kati ka yaritsü ayongzüka liasü.

### Nasha Mukta Bharat Abhiyan indang video sayaogo

**Dimapur, Aami/June 08 (TYO):** Kohima District Administration indang Nasha Mukta Bharat Abhiyan (Ministry of Social Justice and Empowerment) video ka Deputy Commissioner, Kohima Gregory Thejawelie, NCS ajanga June 8, 2021 nü Deputy Commissioner, Kohima indang Conference Hall nung sayaja liasü.

Nasha Mukta Bharat Abhiyan ya temesepba miim mozü agi tamajungtiba kongshir aliba district 272 nung 'drug free India' takok angutsü atema tenzüka sentong ka lir.

Iba sentong indang

awareness video ka Nasha Mukta Bharat Kohima indang YouTube channel nung saya liasü.

Mozü-lar temi takum nung timtem ajuruba aser parnok takum kuli ashiba indang video tatsüka upload süogo.

Temesepba miim mozü achiba tebilemtsü koktetsü atema sorkar indang jenjang balala nung mapa tejangja inyaksü nungdakker, ta Deputy Commissioner, Kohima ajanga ashi aser Nasha Mukta Bharat Abhiyan team, Kohima dang tetetzü tajung aketba video yangluba atema pelaba lemsatepa liasü.

Temesepba mozü aser yi anema raraba nung iba ama video yagi nüburtem nem shisatsü tajug agütsür, ta pai ashi.

Nasha Mukta Bharat Abhiyan team, Kohima ajanga iba ama mozü aser yi-lar temi teyari agitsü atema helpline number ARK foundation - 7005430252, Kripa Foundation - 9089273154/7085659771 kripanagaland@yahoo.co.in, Youth Mission - 9436016536/9 4 0 2 8 1 3 3 7 7 www.youthmission.in, tnyekha@gmail.com nung tongteprateptsü maongka agütsür.

### Nübur aser medical staff nem tenokdangba magütsüsüla: DC Kiphire

**Dimapur, Aami/June 08 (TYO):** Kiphire nung aliba yimtsüng kar nung ketdangsürtemi medical staff tem densema nüburtem yimtsüng telungi aitsü aser adoktsü memelaba ozüing agüja lir, ta Deputy Commissioner, Kiphire, Rahul Mali, IAS ajanga sangdong ka nung ashi.

Iba ama temelaba melie

totuyuba agütsüba ya ajanga sorkari totuyuba agüja aliba nung aibelena tetsükdaktsü agütsür aser ano nisung kija shia temeden agiener, ta Deputy Commissioner, Kiphire ajanga ashi.

Iba ama tenokdangba agütsür nem Indian Penal Code indang Section 186 aser 188 kübok aser Disaster

Management Act 2005 indang Section 51 aser Nagaland Epidemic Diseases Regulations 2020 nung aliba ama temerenshi agütsüsü.

Medical staff tem densema nüburtem yimtsüng telungi aitba mesüra yimtsüng nungi aoba nokdangba yimtsüng ketdangsür nem temerenshi agütsüsü, ta sangdong ajangasa ashi.



Tang ama Covid-19 tashidak wara tesashi agi nübor tem tetsübuttsüka amokmerendang, Covid mozü kidang inyaker tem tonga oagi sarasademja yariteptsü asoshi Dimapur nung Dimapur Area Ao Baptist Churches & Ao Civil Societies Co-ordination Committee purtemi Covid mozü ki ajak nung inyaker tem nem chiyongtsü agüja yaritepba sentong maneni inyaka odagi. Tanü Mongolbar nüa parnoki Covid Hospital 7 den CMO office nung inyaker tem aser Covid Care Center anepalurtem asoshi chiyongtsü bener oa sarasadem mapang agütsüogo. Parnokisa ano June 10 nü tanga fontline woker-tema semdangtsü sentong lir ta angazüker. Tang tashi nung parnoki Covid mozü kitem nung inyaker tem asemnü semdangogo. Iba sentong ya Tsüngremi mulungba ka tashi maneni aotsü parnok terenemba lir. (Dimapur, June 08, 2021).

### Minister Imna Along Longkumer dang pelar

**Dimapur, Aami/June 08 (TYO):** COVID-19 tashidak wara agi alima tesem ajunga sünger nüburtem timtemba ajiteta, Minister, Higher Education & Tribal Affairs, Nagaland, Temjen Imna Along Longkumer-i Dimapur nung nem jang (seret 50) bag 20 tenla agütsüba asoshi kanga

pelar, ta Dimapur Molungkimong Senso Telungjem indang tir T. Nungshi Tzudir aser tezülur S. Maong Longchar nati sangdong ka ajanga ashi. Tsüngremi lenir takum tali moajang aser pa wadang nung maneni moajang ta sarasademtsür, ta sangdong ajangasa ashi.

### Marepkong ward yimden-i NLA speaker dang pelar

**Mokokchung, June 8 (TYO):** NLA, Speaker, Sharingain Longkumer-i tawa tanü kanga nungdakba osettsüset- PPE kits, face masks, hand gloves, Oximeters, infra-red thermometers aser Rapid Antigen Test kits Marepkong Ward nung nüburtem nem tenla agütsüba asoshi Mokokchung town kübok aliba Marepkong Ward

Chairman, Toshikabai lenir dang pelaba sangdong ka ajanga metetdaksü. "Asen lima nung Covid-19 tensa tamajungba mapang ka nung nüburtem atema aria bilema item jenjang tulu aketba aser tajanzük agütsüba osettsüsettem tenla agütsüba asoshi asen lenir aser par kibong dang kanga pelar" ta Marepkong Ward Chairman-isa shisem.



Mongolbar nü Dimapur Ao Lanur Telongjem kübok Signal nung alir lanurtemi Covid frontline nung inyaker tem nem chiyongtsü agüja sarasademtsüba sentong ka agiyonga aoba noksa nung angur (June 08, 2021).

### Nagaland House, New Delhi nung World Environment Day amung



**Dimapur, Aami/June 08 (TYO):** World Environment Day nungtem nung Addl. Chief Secretary & Chief Resident Commissioner den Nagaland House, New Delhi nung ketdangsür aser staff temi Nagaland House, 29, Dr. APJ Abdul Kalam Road, New Delhi nung June 8, 2021 nü anepdang 11:00 ako nung süngdong tabu balala tejang 200 shi tema liasü.

koda tongtipang ta asüba indang rateta shia nüburtem nem shisatsü agütsüsü aser nisung memchir ajanzüksü atema libajen yanglushitsü indang jembiba liasü. Iba anogomung nungtem nung ketdangsür aser staff ajungai süngdong tema liasü.

Addl. Chief Secretary & Chief Resident Commissioner ajanga World Environment Day

Iba anogomung atema AoChuba, IFS, Director of Intanki National Park, Nagaland aser Navneet, IFS, DFO of West Delhi nati süngdong tenlaba atema ACS & CRC ajanga pelaba lemsatepa liasü.

### Tetsür atema Army Recruitment Rally alitsü

**Dimapur, Aami/June 08 (TYO):** Soldier General Duty (Women Military Police) ama shimtsü asoshi temsüa aliba tetsürtem nungi Indian Army ajanga application meshir.

ya Shillong nung agitsü sentong lir, ta sangdong ka ajanga ashi.

Registration ya online ajanga agitsü, koba June 06, 2021 nungi July 20, 2021 tashi alitsü. North East state tem nungi candidate tem atema iba rally

Rally agitsü anogo aser tesem tejangja shia aliba admit card tem candidate indang email nung yoktsü. Iba dak sendakba nung tali tejangja metettsü aser registration atema portal www.joinindianarmy.nic.in nung angutsü, ta sangdong ajangasa ashi.



Mongulbarnü Assam Rifles War Memorial, Laitkor, Shillong nung Lieutenant General Pradeep Chandran Nair, Ati Vishisht Seva Medal (AVSM), Yudh Seva Medal (YSM), DG Assam Rifles-i narö yuja tetushi agütsüogo. Assam Rifles nung Director General inyaksü mapa agizükba sülen General Officer Pradeep Chandran Nair-i iba nungshilung nung taküm bendanga agütsür nem mezüngbuba narö yutsüogo. (Shillong, June 8)

### Assam sorkar office nung Tir, PM aser mezüng CM noksatem ayutsü

**Guwahati, June 8, 2021**

**(Agencies):** Assam sorkar indang office ajak nung India President, Prime Minister aser Assam nung mezüngbuba chief minister Gopinath Bordoloi nung noksa ayutsü telemtetba agiogo.

Mongulbarnü Dispur nung chief minister Himanta Biswa Sarma menden ser cabinet senden ka amendang iba telemtetba agi.

Cabinet-isa Nagaon district Batadrava Than Cultural & Tourism Project mapa takok ngua inyaksü atema ali bigha 35 talila lezmüksütsü lemtet.

Cabinet-isa tzümet süng ajanga teraksa bentsür aruba inyakyim tezübaba akümtsü aser infrastructure yanglushitsü molung agizük. Iba atema district magistrate temi April 1 nungi October 31 tashi mapa inyaksü.

Assam nung nakmati talila abenba truck garitem

mesenzüda ktsütsü atema Cabinet-isa inter-state border gate ana nung gari touzük odangtsü lemtet.

Truck indang touzükji Digharkhal aser Srirampur inter-state borders nung odangtsü.

Darrang district kübok Gorukhuti aser Sipajhar nung ali atsünga agirtem ket nungi sorkar ali bigha 77,000 meyipa anguba ketdangsiä reprangtsü atema MLA Padma Hazarika menden ser luden ka shimogo.

Asom Ratna, Asom Bibhushan, Asom Bhushan & Asom Shree agütsütsü:

Tanü Assam Cabinet-isa küm shia State Award tongti pezü agütsütsü telemtetba agi.

Sempettemji Asom Ratna, Asom Bibhushan, Asom Bhushan aser Asom Shree asütsü.

Asom Ratna ya State Award ka lir aser küm asem sülen khen agütsü. Ajisüaka,

Cabinet-i taküm nungibo küm shia agütsütsü lemtet.

Tanüngba sempet asem-Asom Bibhushan, Asom Bhushan aser Asom Shree ya tasen lir.

Asom Ratna award ya küm shia nisung ka nem dang agütsütsü aser iba nung Rs 5 lakh senpet dena lir.

Külen Asom Bhushan ya pungu aser Asom Shree award ya nisung 10 nem agütsütsü.

Asom Bhushan award nung Rs 2 lakh senpet aser Asom Shree award nung Rs 1 lakh senpet dena lir.

Küm shia Assam nung December 2 nü Sukapha Divas (Asom Divas) amongdang item sempettem agütsütsü. Assam nung Ahom chuba yimli mezüng amentetba tenüng nung iba benjung amonger.

Mongulbarnü Assam Education Minister Ranuj Pegu-i iba osang metetdaksü.

### AR-i Mizoram nung methamphetamine süngjang aika angu

**Aizawl, June 8, 2021**

**(Agencies):** 23 Sector Assam Rifles indang Serchhip battalion-i methamphetamine tablet aika puogo.

Mizoram kübok Champhai anasa Assam Rifles aser Champhai customs department-i mita ao.

Iba mapang parnoki Zote nung Rs 18,05,00 alang

methamphetamine tablets ngutet.

Külen, Assam Rifles indang Aizawl battalion-ia Durtlang Hills nung gari lendong ka nungi nisung ana kümzükogo.

June 6, 2021 nü Durtlang hillside nungi gari ka tsüok aser idangji Assam Rifles indang medical team tesem tonga orr first-aid agüja yari.

Maneni, 23 Sector Assam Rifles indang Lunglei battalion-i anentsüh agi anenbangba Aizawl-Lunglei Road lapokba nung yaritep.

Anentsüh agi lenmang anenbangba sülen Assam Rifles sepaitem tesem tonga ao aser idakji alirtem aser district administration den yaritepa lenmang lapok.

**Piles Cure Centre** - Kabiraj dang alakteta pelaba metetdaksür. Piles, Fistullah, Gastric, Sinus, itching, Tonsil-Ajma aser Diabetes agi ni kangshia liasü aser Rectum nungi azü alu dang mapang talangka item timtem nungi junga taneptsü mang. Ajisüaka, tang **H. Umar Chesam contact no.8416087414 / 7627998690** Address: Burma Camp 2nd Police point opp. tetuyuba nung anidaka surgery kecha magii (non-surgical) anepalur anogo ishika tsüngda ni taneptsü ngua liasü aser iba sülen tanü tashi kü temang nung timtem kecha mali. **Time:7 AM- 3 PM -Yours sincerely -Lorenzo Merry, Add: Lotha Colony**



### ULFA (I)-i Assam Police & Home Department aitsür

**Guwahati, June 8, 2021**

**(Agencies):** Assam Police aser Home Department-i olulu aika prokshir ta United Liberation Front of Asom Independent (ULFA-I)-i aitsüogo.

Upper Assam nung ULFA (I)-i tashiyim agi sen meshi ta Assamese newspaper ka nung osang adokba sülen ULFA (I)-i iba osang metetdaksü.

"May 15, 2021 nü ita asem atema unilateral ceasefire alitsü sangoktsüba sülen ULFA (I)-i shinga danga sen memeshi" ta ULFA (I)-i sangdong ka nung ashi.

Osangkaket nung kuli maliba osang adokba aitsür aser tarutsü nung kuli tejangja bushir ang adoktsüla ta parnoki ashi.

"Kechiba Home Department kübok Assam Police-i parnoki mapa shitak meinyaktetba miimbangtsü atema ULFA (I) indang olulu prokshir. Home Department-i public dang osang tejangja metetdaksütsüla" ta

sangdong nungsa ashi.

"Indian Army aser Assam Police longjemer ULFA (I) anema mapa inyakbaji tang tasen masü. Osang adokba nung Home department-i ULFA (I) senotsü tsütsü tashimait küm daksütsü aser olemteptsüsa küm daksütsü ta shia lir" ta ULFA (I)-isa metetdaksü.

United Liberation Front of Asom Independent-i tangatetba shitak nung olemtepba nung amanger. Ajisüaka, onoki senotsü timtem atema dangbo olemtep masütsü, ta parnokisa ashi.

Taoba ita Tinsukia nung grenade ana apokba sülen ULFA (I)-i ita asem atema unilateral ceasefire alitsü sangokja liasü.

Tinsukia nung Tingrai market nung bomb apokba dak sendakba nung Assam Police-i nisung ana apu saka tena ya ULFA den tesentaktep kecha mali ta bushitetogo.



June 8, 2021 nü Assam sorkar-i Class 10 (HSLC) aser 12 (HSSLC) board exams August 1 nungi August 15 tsüngda agitsü ta sangdongogo.

### Manipur nung AR-i tasür kibong nem Rs 10 lakh agütsütsü

**Imphal, June 7, 2021**

**(Agencies):** Assam Rifles-i Manipur nung yimdaklir ka khasetba atema Rs 10 lakh teyari agütsütsü.

Hokolbar aonung Kangpokpi district kübok Chalwa yim nung iba lendong atalokba sülen nisungtemi lungkak aiter.

Iba nisungji arishi küm 26 tain Mangboilal Lhouvum aser pa ya aayanger ka liasü.

Assam Rifles, Manipur sorkar aser civil society telok lennirtem tsüngda teyari agütsütsü atema tenangzüktep agi.

Iba tenangzüktep agiba nung Army headquarters dang nungi tekaratiba nung temelaba meshir Banglabung nung aliba 44 Assam Rifles company agentsü mesüra melentsü.

Iba tesem nungsa tekaratiba nung armed police station ka lapoktsü aser police 40 bosa

mapa lezmüksütsü lemtet.

Iba tenangzüktep nung 22 Sector Assam Rifles Commander Brigadier PS Arora, Additional Director General of Manipur Police, Sub-Divisional Officer aser civil society telok lennir asemit sign asü.

Iba tatalokba atema tang tashi nung police mesüra Assam Rifles nungi sangdong kecha magütsü lir.

Osang angazükba agi, tawa tu Kuki Revolutionary Army-i Chalwa nung finance secretary mapa lezmüksü aser ozüngi memelaba tax saru.

Telungpur telok jagi FCI food distribution truck dak tenük yoka mapa inyaker.

KRA finance secretary maitsü metettsü atema Army Major kati anir Assam Rifles telok ka civilian ama iba yimi ao. Iba mapangji lendongji atalok ta osang angashir.



Mongulbarnü Union Ministry of Health & Family Welfare-i Manipur nem oxygen concentrators 50 agütsüba noksa nung angur. Manipur chief minister N Biren Singh-i Twitter nung oxygen concentrators ajanga Covid-19 agi shirangertem yariba nung teyari tulu angutsü ta metetdaksüogo. Union Ministry ajanga agütsüba oxygen concentrators ji Indian Red Cross Society, New Delhi-i tenla agütsüba lir. (Imphal, June 8)



## TIR YIMYIM YIMOBILEM (EDITORIAL)

DIMAPUR RASEMNÜ, AAMI (JUNE) 09, 2021

### Tongpang nung metsübutä

**A**senokibo meraraner saka tsükchirtemi asen lima makyonga arur, anungji ajemajema atätsüla masü asenoka tsükchirtemji tenokdang dang nokdangtsü atema tongpangi aotsüsa adoker, anungji yimteni senso ajak tongpangi aotsü ayongzüker, yangji asenok ajak tenüng lir, anungji tongpang jagi aotsü. Ajisüaka, tongpang nungji asütsü tsübuseta tongpang jagi aotsü asü? Ibaji nokinketer senso tajung ka mulungsentsü masü. Kechi kodaser tasü tsübua tongpangi aotsü? Tasütsü tsübua tongpangi aobaji tongpang nung menokdakdangyongi paji mesüra laji süogo ta bilemdi. Iba jagiang, William Shakespeare-i yangluba otsü nung Julius Caesar-i "tasü maitertembo aiben asür," ta ashiba asenoki azünger. Aji shitak lir. Tanü asen tendak iba Covid-19 tashidak wara tongpang nung nokdakertem asenok aika tang tashi nung aiben süogo, kechiyong asenoki Covid tashidak tsübua agi timtemer aser shiranger meyaritet, nübortem asoshi mapai aotsüba anogo nung mao, tagütsütsü tim magütsü, tasü mang dena tsübua anogotem shia nung to asenoki asenok süadokogo ta bilemdi. Alima nung tasü maittiba takümüji tasü tsübua agi temeim mapa ka meinyaktetba mesüra pei tata shilem ka meinyaktetba takümüji asütsü. Asenoki khen aroka shisadangtsübaji alima nung ya tasü tsübua alitsüba masü saka masü dang pei teinyaktsü ka meinyaktet asütsüang tsübua mapa tajung inyaktü merangtsübajiang tongtibang lir. Aji oda, asen lima nung mozü ki kar nungbo mozü kidang inyaktetmi tashidak tsübua agi shirangertem anasaia mao, tanga takdang nungi dang CCTV camera ajanga shiranger repranga anepaluba osang angashidang kang aoksar aser jashia bilemer. Mozü kidang inyaktetmi tashidak tsübua agi shiranger anasai marutet nungbo, asenok ajak asoshi aji alima tatem asütsü, asenok ajak yangji süadokogo ta bilemdi. Aji oda, iba yimobilem tetenzüklen ashi ama, sepaitem kodaser tsübuseta tongpangi aotsü? Merila pezünu aser keyi pongzü tsübua aluyimer alui mao nung kechi ataloktsü? Tangar pei taküm asütsüa metsübui ita petinui atur, tzüim telongi alur aser yawara aser tashidak wara agi kangshiba limatem nung oagi mission mapa inyaker. Item taküm denji kodang asenok den medemdangdir, asenok yabo ak amato kiburi agütsüba chiyongli kazüli ta asüba takümütem amai asenoksasa asenoki reprangtetsü. Asenoka joko yamaji kari agütsüba agizüka chili kazüli ta asüba aser mapai mao ita sen agiba aser pei tata shilem meinyak ser menden nung amenba jakla aser shisatsütem endoktsüla. Tanü putu ya nia nübortem asoshi kechi tajung inyaktü ta bilema toktepba putu lir. Iba putu ya pei designation azür kazüba putu masü saka pei designation dang nungi alema extra mile jajatsüba mapang lir. Ibai nisung ajak pei pei tongpang nung tasü itta nokdakba putu, anungji tsükchir tsübua mapang masü. Iba jagiang pibo Chief minister dena PPE agir Covid hospital nung shirangertem mulung süngzükja jajaba angur. Ibaji shirangertem asoshi mozü tajungtiba lir. Iba kasaji asen lima nung asenokia inyaktüla. Alui aotsü tsübua alu mayimtsüla. Ibaji pei asoshia majung aser tangar asoshia kanga takoksa. Tanü alima tashidak wara aruba yagi asenok nisung shia dang, asenoki tang bena aliba mapa ya inyaktü temsür metemsü (?) ta asüngdang. Iba tashidak wara yagi shitakba asenoki jembiba amato asenoki khuret bentetter asü mebentetter, lenisüba agütsütetter asü magütsütetter aser tsüngdong oagi temeim sayutetter asü mesayutetter? Asenok ya shitakba lenir asü (?), lenir ama sayur rongsen bushir taküm ka dang ta asensasa bilemdangtsüsa tasüngdangba aika temulung nung enoktsür. Joko, asenok anemsü agi yimsüsüba aser ketdangtsüba putu masü kümogo. Joko proxy putu-a süitema odagi. Asenoka, joko, asangsang lima nung alitsü tenzükogo. Iba asangsang lima nungbo tashidak tsübua medical mapa meinyaktetsü, nübortem dang memeim ser meimer ama mesayutetsü aser memetet ser temeteteter ama melitetsü, kechiyong mapa ajak pei taküm aser mapa agi kuli süa metsübui inyaktüsa kümogo.

## OLEMSABANG

### KILIR BUSHIA ANIR ARUTSÜR, KIBUR ASER OZÜNG

- Maong Jamir

#### Merenba aser Toshila nati Ozüng memeteti inyakba

Merenba aser kinungtsü Toshilar kibongi Theology azünger asangur chanu ka yaria liasü. Iba asangur ya tanga lima makamaiter kibong ka nungi liasü. Merenba, Toshila aser jala jabasotem Tsüngrem temetet asünung, parnoki asangurba dang kanga meim aser pa nungdaktem ajak tarendak makai peritsü.

Asangurbai Merenba-er kibongi tenyaba aser ashiba kecha mepaitoktsütet. Anungji kenü anogo Toshilai la den yariteptsü asoshi tetsür ka anir arujang ta asangurba dang asüngdang. Mapang tetemsü nung asangurbai par kinunger tetsür chanu ka anir arutsü. Tanütsüla ya mapa kanga temerang aser Toshila, par kinungpu aser jala jabasotem ajak kanga tangatet asünung kilirlaji jangratema dang ali.

Kilirla mapa tajung ngua kinonger, kiyonger aser yimer aikati la ama nübu parnok asoshia nungdaker tasa lemsatepba liasü. Kenü anogo iba Theology azüngsang pei limai sodi aodang, kilir aginür kinunger, kiyonger aser medemer dang osang agütsü aser Toshilar kidang sentepba, kilir aginür ajaki merijang asem sem asangurba nem bener yok. Theology azüngsangji temulungjang nung lung tulu ka alenlok ama khuret tulu bener pei limai shilang.

Tanurji mungutetra Merenba aser Toshila na tsüngdang taaktsü aser sentsü ka ama pai bilem. Anungji, pei lima tonger Theology azüngsangji makamaiter kibongtem sema, joko tiyazü tenangzükba aika agi Naga limai aotsü asoshi parnok mesüzük.

Kanga meranga bushir, kibong pezü nungi tetsür chanu pezü ngua asen Naga limai shilang. Sen 12,000 angubaji Theology azüngsang atema kanga tulu liasü. Saka, pa mulungjang nung kanga tipmatemi item tanurtemji anir arutsü. Theology azüngsang aruba anogo nungjisa benjong ka amunger ama Merenba aser Toshilar kidang sentepba tetsür pezüji oset kaka ama pelatepba lemshi.

#### Ruthla kiburi azükba agi jena aoba

Theology azüngsangji tetsür chanu tsüraburtem dang tenangzükba ajak to tiyazü ta meilongi meteta aru. Parnok rongnung Ruth ta sür tetsür ka liasü. Ruthlar kiburji nisung kanga tamajung liasü. Talisa kiburtsürlai aiben la kanga rishikangshia amshi. Ibaji dang masü, la Schooli meyok, aben süoshi teperi magütsü aser lar kinunger den a mobile ajanga o mejembidaktsü. Iba ama terokong tia nung Ruthla kanga temulung raksaa aiben nüktzü yima jeba liasü.

Kenü anogo kiburtsürlai Ruthla dak kanga mejungi azük aser temang nung tarak aika atu. Iba aonung Ruthlai maremtet kidang nungi jena aotsü asoshi mulungtet. La koloni aotsü memeteti la apuso ao.

#### Police-i apuba

Ruthla yamaji nemzüa alidang tetsür Police-i la ngua teyari agütsü. Police-temi la otsüji jungjunga anga aser la ya nisung shishilembaba (Human Trafficking) lendong nungi tsükba (victim) ta angatet. Anungji Police-temi iba obendangtsü (case) asoshi tapet ozüng-obendangba nem agütsü.

Kodang iba tebilemstüji bushitep; tamasa Ruthlar kibur Police-i apu, iba sülen Merenba aser Toshila na apu, Theology azüngsang aser tatem nung tangar kibong asem pronglaji apu. Tangar o makokdang, Theology azüngsangji ozüng nung aliba ama nisung shishilembar ka ama merenshi aser pa taküm nung tarak atu.

#### Nisung shishilemba lendong

Tanü asen Ao lima/Naga lima kibong aika nung kilir yua lir. Ano anogo shia kibongtemi "Ozüa kilir ka nungdaker/ teyariteper ka aginür" ta mesüra "ozü nema ka anir arujang, sen kwi meshidir agütsütsü" ta jembir. Sen ya temenen anungji nisung aikati sen aginüyong, tiyazü jembia asen limai kilitsü asoshi tanur anir arutsür.

Tanü putu nung nisung shishilembaba ajanga sen jenti ajangzüker. Nisung shishilembaba (supply) tenzükbaji 'taginür' aser 'temeshir' (demand) aliba yong lir. Tanü asen Ao lima/Naga lima nunga kilir 'aginür' aser 'temeshir' jenti lir. Saka kodang taginür mesüra temeshir anendir, nisung shishilembaba anentsü.

Lendongi maittsü asoshi, kidang kilir yua alirtemi, na iba kilirji koma angu ibaji ken meyiba reprangshitsü nungdaker. Ano kilir bushirtemia kanga kümdanga inyaktüla. Nai kilir aginüba yong kar kanga ajungshira mesüra kar nem sen agütsüra, na ozüng anemer ta angatetsüla. Aser kenü anogo iba ozüng jagi na alentsü.

#### Tangatetsü

- Merenba aser Toshila Tsüngrem kanga junga metetba kibong ka liasü, saka tenati alima ozüng memeteti liasü.
- Merenba aser Toshila nati teyari agütsüba den külemi tanga mapa nung Theology azüngsangji amshitsü tenzük.
- Theology azüngsangji pei jangraba agi masü saka nübortemi nisung shishilembar ka kümdaktsü.

Tsüngrem O-i yamai ashir, "Kibubai yamai ashir, "ochi aser temeshiba inyakang, aser shiba dak rakzükraitem pa tekangshir ket nungi kümzükang; aener, tebu malir, mesüra amitsür dang tim masüba teinyak, mesüra teka teyi, mesüra iba talidak tai makaba zü tetokshi."(Yer. 22:3)

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Myanmar sepaitemi Kayah state nung ano Tenlaki karaksatsü



June 06, 2021 anepdang Myanmar nung Demoso jila kübok Doungankha yim dak sepaitemi bomb aser injang agi Queen of Peace Tenla ki khasaja aliba noksa nung angur.

**June 07, 2021:** Myanmar anüdoklen aliba Kayah state nung sepaitemi ano maneni bomb agi Tenla ki ka raksatsüogo.

June 6, 2021 anepdang Demoso jila kübok Doungankha yim dak sepaitemi Queen of Peace Tenla ki amak, ajisüaka nisung masü mesüra meyiru, ta Arogo lenirtemi metetdaksü.

Sepaitemi injang aser bomb amshia amakba mapang nung Tenla kidangji nisung shinga maliasü, ajisüaka bomb aser injang agi Tenla ki jara aser kichiba raksatsü.

Hopta ana tsüingda Kayah state nung tang agi Tenla ki tasembuba raksatsür. May 23 nüa Demoso jila kübok Kantharyar yim dak Sacred Heart Arogo Tenla ki amakba mapang nung Khristan pezü asü aser nisung ti yirua liasü.

May 26 nüa sepaitemi Demoso jila nung St. Joseph Arogo Tenla ki raksatsü.

Tongti putir, Charles Bo-i, linük nung tekülem kitem aser sobaliba kiojentem kümzüka ayutsüla, kechiyong international protocols nung ajemdaker item kiojen kümzüka ayutsüla, ta mepishia metetdaksüba sülen-a maneni Tenla ki raksatsür.

Kayah state nung rara ajanga nisung 100,000 dak tema Shan state-i jena ogo.

June 6 aonunga Kayah state yimtiba, Loikaw anasa Pekhon jila nung sepaitemi injang yokba ajanga tamangba yimsü dak sendakba kiojen ka raksaja liasü.

June 6 nü Doungankha nung sepaitemi Karenni People's Defense Force (KPDP) puer anema operation aoba mapang nung school ka rongdoktsü aser

ki aika raksaja liasü.

June 4 nungi tenzüka Kayah state kübok Our Lady of Lourdes Arogo Tenla ki kima sepai aika anenzüka lir.

Kayah state nungi jena aoertem nisung lakh 1 dak tema Shan state nung aliba Tenla ki aser convents nung jenoka lir.

Arogo indang social arm Karuna (Caritas) Loikaw-i jenshia alirtem- internally displaced persons (IDPs) nem teyari agüja arudar.

Buddhist nütsüing timba aliba linük nung Khristan nütsüing aika aliba state ji Kayah lir; iba state nung Catholic Khristan 90,000 dak tema lir.

February 1, 2021 nungi sepaitemi Myanmar yimsüsüba mapang nungi tenzüka Kachin, Karen, Chin, Kayah aser Shan state tem nungi nisung 175,000 dak tema jenshiogo.

# Pakistan nung tanur tetsü Khristan ka anogo 20 tashi reshikangshi

**June 08, 2021:** Taküm April 1 nü Pakistan nung tanur pongu tetsü Khristan ka apuba sülen anogo 20 tashi reshikangshi, ta International Christian Concern (ICC)-i metetdaksü.

Anogo 20 tashi Muslim nunger telok kati la dak azük, kangshia mozü chidaktsü aser la dak tashiyim mapa inyaka liasü.

Osangbener den jembidang Warris Masih-i ashiba agi, pa kinüngtsü Venus Bibi shishitsü atema bazar-i aoba sülen kidangi meyipa aruba mapang nung Muslim nunger kari lenmang nung la nokdangba sülen gari ka nungi anioker puer ao.

Warris-i ashiba agi, pa kinüngtsü puer aosangji Muhamad Akbar lir. Tamalena Muhamad Akbar-i Khristan tsür ka puer oa liasü saka pa dak tashi tuli aliba dang masü saka rongsen jenti aliba agi

temerenshi nungi jenbu.

Bibi puer aoba sülen Warris-i police dang aiben teyari meshi aser tesüsa police teyari ajanga Akbar-i Bibi chiok. Ajisüaka lai lasa mejajateti Sahoo Ki Malian yim anasa lenmang nung lia angu.

Warris-i, "Onok sensaker aser Khristan asübayong police-i la puer aoertem anema kecha meinyak, kechiyong pai (Akbar) police nem sübokrem agütsür liasü," ta aitsü.

"Ajisüaka ni kü kinüngtsü atema ochi temeden aginer. La puer aoer ajak apuba sülen temerenshi agütsüdaksüner, ibaji ajanga dang tarutsü nung parnoki Khristan tsürtem puer maotsü," ta pai ashi.

Doors watch list).

Alima nung Muslim nütsüing timtiba aliba linük tanabubaji Pakistan lir. Iba linük nung Khristantembo 'second-class citizens' ama züngshir aser sorkaria Khristantem nem security magütsür.

Pakistan nung Khristan tsürtem puer aoba, reshikangshiba, kangshia Islam yimsü dangi meyipdaksür kibong akümba aser tepsetba kanga bulua ataloker.

"Yimlibilema Pakistan nung asen adianu aser aianutsürtem atema sarasademjang. Reshikangshi liaka iba linük nung Arogo tashi aitsü atema sarasademjang. Venus Bibi aser la ama tia ajururtem atema sarasademjang. Lar kibong nem tesünep agüjang aser anepjang ta sarasademdaksüner," ta International Christian Conceren-i mepishia metetdaksü.

# ANO GO ABEN TSÜNGREM DEN

## Meshitettsü aser yok

*Ochi nung parnok meshitetjang: Ne O ochi lir. Nai kechi koda alimai ni yok, yamaji Nia parnok alimai yoker. Yohan 17:17-18.*

Tsüngremi teti na meyokdang tama meshitettsür. Tebui nütsüing tera ana shimtet aser temeshi ochi, Pa jabaso ajanga meshitettsü. Parnok Yisu den sendaktepa ali nung ochi agi (Yn. 14:6) nütsüingtemi ochi ajanga aser osangtajung sayutsüingitsü asoshi renemtsü. Yisui parnok tejangraba jazük (challenge) (Luke 9:46-48), parnok tamang ilaba indang ashi (Matt. 17:19-20), Satan arutsü (Matt. 16:23), aser parnok asükümba aitsü (Matt. 26:33-35). Kodang Yisui parnok renemtsüba atema alimaji aki ama malitsü saka melenshidaktsütsü ain agütsür Pai parnok alimai yok. Temeneni Tsüngrem tsüingdang na tamakitsü kümdaktsür ta Satani puatsü akok. Tiyazü tulu nungi ibaji tiyazü aruba asütsü. Nai temenen menali Tashioktsübai "Nai tamakok nguogo. Na tang joko Tsüngrem tsüingdang takidak maka" ta ashitsü. Iba yagi Khristan ka dangi tamakokji tali shisanga aser tali teyimla makaba kümdaktsütsü. Aji saka, Tsüngrem tanela ka nüji kümdaktsüba kecha dena medemdangtsü makok. Kodang Tsüngremer nüburi Tsüngremer ochibaji Tsüngrem mulungba nung ayutsü mulungtetdir, idangji Tsüngrem ainji mezüing nütsüingtem nem agütsüba ama parnok ajanga kasa yoktsü.

Ochibai na nüji kümdaktsütsü. Ochiji "Asenoki asen temenen nangzükra, asenok dang asen temenen adoktsü aser memeshiba ajak nungi asenok merükdaktsütsü, Pa temulung lemtetba aser ochi lir" (1 Yn. 1:9), aser asenok Tsüngrem asoshi alitsü agizüker.

# Gujarat state sorkari Anti-Conversion ozüing yanglushiogo

**Aami/June 08, 2021:** India kübok Gujarat State-i tawa anti-conversion ozüing yanglushiogo, aser ozüing tasenbaji June 15, 2021 nungi mapa küma International Christian Concern (ICC)-i metetdaksü.

Tang India nung state 9 nung anti-conversion ozüingtem lir, aser tang tesüsa Gujarat nung iba ozüing tasenba kübok kibong akümba ajanga kangshia yimsü melendaktsüba nokdangtsü.

Gujarat nung anti-conversion ozüing tasenba ya April 1, 2021 nü state legislature-i agizükba sülen May ita nung state Angh-ia agizüka liasü.

State nung BJP-i aniba sorkari, kibong akümba ajanga kangshia tamangba yimsü meyipdaksüba kanga bulua ataloker, anungji tang iba ozüing yanglushiba agi kangshia yimsü meyipdaksüba nokdangtsü, ta metetdaksü.

Tanga state tem nunga anti-conversion ozüing nung ajemdaker Khristan aser Muslim nunger densema minorities reshikangshiba kanga bulua atalokdar.

Tang India nung anti-conversion ozüing benoka aliba state temji Uttar Pradesh, Odisha, Madhya Pradesh,

Pradesh, Chhattisgarh, Gujarat, Himachal Pradesh, Jharkhand aser Uttarakhand state tem lir.

BJP sorkar aliba state tembenoktsü, ta Mongolbarnü Haryana, Assam aser Karnataka-ia state nung Khristan aser Islam yimsü dangi meyipba nokdangtsü atema anti-conversion ozüing nungdak, ta shiogo.

India linük tesem ajaklen anti-conversion ozüing benoktsü atema temepishiba ken o ka agüja liasü saka India nung temaba court- Supreme Court-i magizük.

Taküm April ita nung iba ken o angadangba mapang nung Supreme Court-i, peii melungba tamangba yimsü amangtsü atema linük nung arrshi küm 18 ser temapurtem nem temeden agüja lir, ta shia linük tesem ajaklen anti-conversion ozüing benoktsü mepishiba magizük.

Iba temepishiba ken o angadangba mapang nung SC bench nungi züngsem aseme, linük temzüing kübok tamangba yimsü mashie shimtsü atema arrshi küm 18 ser temapur senso ajak nem temeden agüja lir, anungji tamangba yimsü melenba anema ozüing ka benokra ibaji linük temzüing anema asütsü, ta obendang agüja liasü.

**OLONG PAITEP # 5838**

1		2		3		4	5			
				6						7
		8								
9				10		11				
			12						13	
						14				
16						17				

<b>TIPILEN</b> 1. Nisung jenti - (5) 4. Tsük rudenba - (5) 6. Temzüng tesashi - (5) 8. S_ _ _ i - (3) 9. Nisung rongnung telemsa - (3) 10. Anogoshi - (4) 12. Ajanga aor - (4) 13. Tsük rizüngdak - (3) 14. Tebang nungi adokba - (3) 16. Süngdong tatembangtiba - (5) 17. Meputep - (5)	<b>LANGTSÜNGLEN</b> 1. Tenük telong - (9) 2. Committee dang ajar - (5) 3. Yagi ki okdoker - (7) 5. Yim lenmang - (5) 7. Temoatsü keter meyipa aruba - (9) 11. Kanga junga menemba - (7) 12. Kenyongi majinü - (5) 13. Rong kanga tulu - (5)
---	---

**OLONG PAITEP # 5837 TELANGZÜBA**

<b>TIPILEN :</b> 1. Tanga, 6. Wara, 7. Rajang, 9. Anük, 10. Jenjang, 11. Alar, 14. Ngashi, 15. Nala, 16. Mechi.	<b>LANGTSÜNGLEN :</b> 2. Anga, 3. Yabang, 4. Tarok, 5. Orak, 8. Ainer, 9. Anema, 10. Jabili, 11. Among, 12. Miim, 13. Anem.
--	--

**ALOKBAI POLICE ASHIOKTSÜ :**  
*Künü anogo Alokba mozü bena lia police-i apu -*

**Police** : Mapang talangka nungi na ya lahdanga aruba tanübo menepogo, na jail achitsüa. Kong nungi angu?

**Alokba** : Sir, ni ang tasüngdangma. Kong nungi arurar memetet, kü pocket nung arua lili ni toilet nung oagi inoktsüli, saka ano kü pocket nungsa arua atali asür aja.

**Police** : Arree aji shitak na?

**Alokba** : Aito Sir, mamangra tendangdi ni?

**Police** : Challoo.  
*(anasa aliba toilet kati or mozü jangtemji inoktsür tzü agi flush sür tatsüka ataa ali)*

**Police** : Kwa nü pocket nungji mozü to arur maru?

**Alokba** : Kechi mozü?

**Police** : Oh Alokba!!

*Lilir : WhatsApp*

**TANÜBO NAI LANGZÜANG**

Q. Environmentalist koba ajanga Biodiversity 'hotspots' indang tasa mezüng agütsü?  
 A. Gaylord Nelson                      B. Norman Myers  
 C. John Muir                              D. Julia "Butterfly" Hill

===== (Taruba adok nung onoki langzüksü)

**YASHI ADOK TELANGZÜBA : Madhya Pradesh**

**AO OSHI ANGAZÜKDAK:**

**TANÜ ANGAZÜKTSÜBA OJANG**



Tir Yimyim

**Joko**

(adv) ya serbo / iba sülen (henceforth)

\* **Joko** ni kodanga tamajung meinyaktsü.

**Jong**

(n) Tsükchir den raradang temang tongdangba oset ( Shield)

\* Akhi mapang nok nü agi leptept-süngtept dang **jong** amer rara.

**NAI-A YA METETTER MA?**



Chennai nungi tebur kati yimya balaka amshia apui jaja atuba atema Guinness World Records (GWR) ostü tassen yangluogo. Aadhav Sugumar-i 'hula hoop' süa apu jenjang/mera (steps) 50 tashi kara tuteta liasü. Second 18.28 nung Aadhav-i iba alizüng tongteta pai taoba record ajangtetogo. Aadhav-i hula hoop süa apui atuba video ka Guinness World Record-i Instagram sabang nung lemsatep. Tesüiba küm ana nungi Aadhav-i 'hula hoop' yimyatem angazüka aru aser taküm April ita pai Guinness record atema merangdangtsü lemtet. 2018 küm America nunger Ashrita Furman-i hula hoop' süa apu jenjang 50 tashi tuteta lir. Pai second 23.39 agia iba record mezüng yanglua liasü.

**SUDOKU # 5880**

**TELANGZUBA # 5879**

			3		9	4	8	1		2	5	9	4	8	3	6	7	1
4	2	9	1		5			7		1	4	8	6	5	7	3	2	9
	1	8		4		5				3	7	6	2	9	1	5	4	8
	4		9				5			4	9	7	5	2	8	1	3	6
9	3	5	4			2				5	2	1	3	7	6	8	9	4
	7	2	5	3	8			1		8	6	3	1	4	9	7	5	2
7			8	1			2			9	8	2	7	1	5	4	6	3
		3				8		6		7	3	4	8	6	2	9	1	5
		4	6	5	3					6	1	5	9	3	4	2	8	7

**OJANG LUTEP # 5424**

- GANOO :
- JUTANG :
- NGNU :
- PAMA :
- INYMEAK :
- OGANO :
- MAJUTANG :
- ANGAARUDNG :
- AASAS :
- LEMBITET :

**OJANG LUTEP TELANGZÜBA # 5423**

**YIMTI SÜIBAJI TAMBUR MASÜ LJABA TA AJAKI METETER KÜLENBO SASATEP**

**TAN HOPTA ATEMA - KOMA SÜLA ?**

Q. Center government nungi Nagaland atema Covid-19 tongpang nung amshitsü yokba sen ajak yimsüsür aser tulurtemi chia-adok nunga koma süla ?



Defence Minister Rajnath Singh den Defence Secretary Dr Ajay Kumar aser Secretary (Defence Production) Raj Kumar nungeri New Delhi nung India-Sweden Defence Industry Cooperation webinar ka nung 'SIDM Members Directory 2020-21' mezüngbuba sayaba noksa nung angur.

### India nung anogo 66 tsüngda tanü nisung tajemba dak Covid potet

**New Delhi, Aami/June 8 (Agencies):** India nung Mongolbarnü nisung 86,498 dak coronavirus tashidak potetba sangdongogo, koba anogo 66 tsüngda tajemtiba asütsü, ta sorkar sangdong ka ajanga metetdaksü. Taoba ghonda 24 tsüngda nisung lakh ka majung dak dang tashidak potetba ya anogo 63buba nung mezüngbuba asütsü. Ajisüaka tashidak agi asürtem 2000 tema lir. Taoba ghonda 24 tsüngda linük nung corona tashidak agi nisung 2123 süogo, ajisüaka anogo 47 tsüngda Mongolbarnü nisung ishiba süogo, ta health ministry sangdong ka ajanga

metetdaksü. India nung tang tashi nung covid tshidak agi nisung 3,51,309 süogo. Active caseload 97,907 agi tajemba kümogo aser tang 13,03,702 lir, ta Union health ministry-i ashi. Kasa mapang nung taoba ghonda 24 tsüngda shiranga alir 1,82,282 anepogo aser iba ya bendenloker linük nung tang tashi nung nisung 2,73,41,462 anepogo. Anogo 24 nü atonga anogoshia tashidak poteter dang nungi aneper timba lir. India nung recovery rate 94.29% jungogo. Maneni anogoshia positivity rate 4.62 per cent-i asepzüka aluogo. Taoba anogo 15 tashi

positivity rate 10 per cent tekübok lir. Hopta shia positivity rate-a 5.94 per cent kümogo. Tang shiranga alir 13,03,702 dang kümogo koba tashidak menar ajak senteper shilem 4.50 asütsü. National Covid-19 recovery rate-a 94.29 per cent jungogo. Maneni tashidak tendangba jenjanga ajungketogo aser tang tashi nung nisung crore 36.8 dak tashidak tendangogo. Tang tashi nung Covid-19 vaccine doses 23,61,98,726 agütsüogo. Health ministry-i ashiba agi, asürtem ya shilem 70 bo tanga tashidak keta aliba agi asür.

### 2022 tashi nungi plastic amshiba nokdangtsü: Environment ministry

**New Delhi, Aami/June 8 (Agencies):** Union environment ministry-i Mongolbarnü, khen dang amshiba plastic osettem dak sendakba nung ita ana atema awareness campaign ka ayongzüka agitsü tenzükogo. Iba campaign kübok sentong balala agitsü renema lir. Ministry-i, shilem balala kuma lemsar 2022 tashi nungbo khen dang amshiba plastic osettem amshiba nokdangtsü atema March ita osang ka agütsüogo. Plastic sticks aketba ear buds, balloon atema plastic sticks, plastic flags, candy sticks, ice-cream sticks, decoration polystyrene [thermocoll] ama osettem yangluba, belener aruba, bendena ayuba, lemshiba aser ayokba, 2022 küm January 1 nü nungi nokdangtsü.

Iba sülen 2022 küm July 1 nü nungi, 100 micron tekübok aliba plastic oset; aosu, marok, glasses, cutlery, straw, tray, nanglong alepbangba plastic, invitation card aser cigarette packets, aser plastic mesera PVC banners tem amala amshiba nokdangtsü. "State aika nung khen dang amshiba plastic osettem nokdangtsü asoshi shilem balala kuma lemsar inyakdar. Onoki 40 microns dak tekübokba nung aliba plastic juli amshiba nokdangtsü asoshi telemtetba agiogo aser state sorkar ajak dang plastic juli yangluba manufacturing unit tem ajak kanga junga meita atatsü tetuyuba agütsüogo," ta union environment minister Prakash Javadekar-i ashi. Iba campaign amenokba sentong ya

Mongolbarnü international websites aika nung timtem adokba sülen minpronga liasü. Campaign kübok shilem balala kuma lemsar khen dang amshiba plastic oset nokdangtsü atema yimayimpong aser policy melenshitsu, tanga ministry anisemer waste management infrastructure ajungkettsü aser industry associations aser producer, importer aser brand kiburtem den longjemer inyaktsü, ta ministry of environment and forests, secretary RP Gupta-i ashi. Iba campaign ya United Nations Environment Programme, Federation of Indian Chambers of Commerce & Industry aser GIZ, German environment organization amalalokti tentet balala den longjemer amenokogo.

## Maharashtra CM Uddhav Thackeray-i PM Modi den ajurutep

**New Delhi, Aami/June 8 (Agencies):** Maharashtra chief minister Uddhav Thackeray, deputy chief minister Ajit Pawar aser public works department minister Ashok Chavan nungeri Mongolbarnü Ato Kilonser Narendra Modi den ajurutepogo. Parnoki Maratha aser tanga Backward Class tem atema menden mekazüka toktsütsü, legislative council nung züngsem 12 nominate asütsü aser GST compensation dues salatsütsü atema benoka liasü.

Senden nung Maratha kin aser tanga Backward Class tem atema menden mekazüka toktsütsü asoshi sensak asema ya tongtibangtiba onük liasü. State sorkari Centre dang Central quota nungi Maratha nunger nem menden mekazütsütsü aser reservation dak sendakba nung 50% ceiling latetja aliba agütsütsü mepeshi.

"Maratha nunger ken o dak sendakba nung Centre-i review petition ka benokatokogo aser iba ajang SC-i 102nd constitutional amendment dak ajemdaker, kin ka tekübokba jenjang nung lir ta sangdongtsü atema state sorkar dak tashi mali ta ashiba den meputep. Onoki Centre dang reservation cap 50% aliba ya maginra state nem reservation dak sendakba nung tashi agütsüba ya teperi masütsü ta shiogo. Onoki iba cap agütsü atema Centre dang temzüng ozüng kübok jenjang tapet agitsü mepeshiogo, kechiyong iba ajanga Maratha

reservations ken o dak dang masü saka OBC tem political reservation densema tanga ken o aika dak kongshir," ta Thackery-i ashi.

Kasa mapang nung Deputy chief minister Ajit Pawar-i, state-i OBC tem dak sendakba nung constitutional political reservation ka khangogo. "Local body election tem nung OBC atema menden mekazüka tokja aliba Supreme Court-i tawa agütsüogo. Iba ya statutory reservation ka liasü saka 50% cap adenba ajanga agütsüogo. Iba obendang agütsüba ajanga linük nung election ajak nung kongshitsu. Onoki PM dang OBC tem nem constitutional reservation agütsütsü khangogo," ta Pawar-i ashi.

Paisa ashiba agi, parnoki legislative council nung züngsem 12 moninate asütsü atema Maharashtra Angh nem tetuyuba agütsütsü mepeshia asüngdangogo. "Tenüngtem Angh nem ita ti tejakdang agütsüogo. PIL ajak asadanger high court-i tenüngtem benoktsü tuyu. Onoki PM dang züngsemtem shimtsü atema Angh nem tetuyuba agütsütsü mepeshia asüngdangogo. Ano onoki PM dang GST compensation dues crore 24,306 takaratiba nung agütsütsü shiogo," ta Pawar-i ashi.

Chief minister Uddhav Thackeray-i ashiba agi, PM-i parnoki benokba ken o tem süoki ia asadangtsü nangzükogo.

## Jaishankar-i Bodhbarnü Kuwait semdangtsü

**New Delhi, Aami/June 8 (Agencies):** External Affairs Minister S Jaishankar Bodhbarnü Kuwait-i aotsü. Pa Kuwait nung anogo asem mongzüka linük ana tsüngda tesendaktep yanglushitsu atema lenir balala den senden amentsü. Pai Ato Kilonser Narendra Modi-i züluba shiti ka Kuwaiti Emir Sheikh Nawaf al-Ahmad al-Sabah nem bener otsütsü. Jaishankar-i tang mezüngbuba external affairs minister ama Kuwait semdangtsü.

"External Affairs Minister Dr S Jaishankar-i June 9 nungi 11 tashi Kuwait semdangtsü. Foreign Minister & Minister of State for Cabinet Affairs, State of Kuwait Sheikh Ahmed Nasser Al-Mohammad Al-Sabah-i pa jaoka liasü," ta Ministry of External Affairs (MEA)-i ashi.

"Pai Kuwait semdangba mapang senden balala nung shilem agitsü aser Kuwait nung India nungertem den ajuruteptsü," ta MEA-i ashiba den Jaishankar-i, Kuwait Emir dangi Ato Kilonser-i züluba shiti ka bener otsütsü, ta ashi. Energy, trade, investment,

manpower & labour aser information technology amala sector balala nung linük ana tsüngda tesendaktep akangshitsu atema joint ministerial commission ka amenoktsü asoshi linük ana tsüngda telemtetba agiba sülen ita asem lir tang Jaishankar-i Kuwait semdangtsü.

Kuwaiti foreign minister Sheikh Ahmed Nasser Al-Mohammad Al-Sabah-i March ita India semdang aser joint commission ka amenoktsü atema linük anapronglai mulunga agizük. India aser Kuwait na tsüngda tesendaktep yanglur 2021-22 nung küm 60 ajunger. Kuwait nung India nunger million ka shi lir. Kuwait den shishilembar tongtitem rongnung India-a densema lir aser iba linük ya India nem totzü agütsür tongtitem rongnung ka lir.

"Hopta tsüngda India nung COVID-19 den raraba mapang teyari agütsütsü atema Kuwait sorkari India nem liquid medical oxygen supply asüba nung teyari tulu agütsüogo, kong air/sea bridge amenokba densema lir," ta MEA-i ashi.



Petrol aser diesel jenjang ajungketba anema Hyderabad nung Youth Congress züngsemtemi longlak aitba noksa nung angur.

## MULUNGNEN O



06/01/1969 - 31/05/2021

Ozü kinungbu aser onok tenu asür **Limanungsang Longchar** (Molungkimong) ajunbena asuba mapang onok mangyima alidang Arogopur, Kiyonger aser medemertem shirnokisa onok den tejashi lemsatepogo nenok ajak dang kanga pelaba lemsateper.

Talisa onoki Molungyimsen Baptist Arogo aser Molungyimsen Village Council dang kangasa pelaba metetaksür.

Onoki kija kipongtem dang arua meshitetaka, shirnokisa nübo, sarasadem aser rongsen agi yariogo onoki kodanga mamatsü. Ozüi meyipa agütsütsü kacha mali, saka tulusang Tsüngremi nenok talubusa moajangma aji ozü sarasadem.

*Temeim Kinungtsü, Jalatem,  
Kinungertem Aser Adianutem*



**ASSAM RIFLES PUBLIC SCHOOL, ZUNHEBOTO, NAGALAND  
C/O 99 APO, 32 ASSAM RIFLES**

**SELECTION OF PRINCIPAL ON CONTRACTUAL BASIS**

- Application on plain paper are hereby invited for the post of Principal on contractual basis for the Academic Session 2021-22.
  - Qualification** : Master Degree with B.Ed. and minimum 5 years Teaching Experience in CBSE School.
  - Salary** : Negotiable.
- Interested candidate can send their Bio-Data along with photocopy of certificate, photographs, clearly mentioned Address and Mobile Number at the following address on or before 21 Jun 2021. Date of written test/ interview will be notified accordingly.

Commandant  
32 Assam Rifles, Zunheboto  
c/o 99 APO  
mail: assamriflesschoolzbto@gmail.com

**Managing Committee  
ARPS, Zunheboto  
Mob No: 8974048339**



**OFFICE OF THE  
CHUMUKEDIMA AO SENSO TELONGJEM**

**Chumukedima - 797103  
Dist. - Dimapur, Nagaland  
Regd. No. R.S. 1904-9/92**

**Pelaba Lemsateper**

Chumukedima Ao Senso Telongjem yimteni tanü iba Covid wara tenokdangba ajanga tanü poksüng ayanga chionga alir timtemer Aoer kibong 187 nem teyari jang bag ka-ka (Rice 50kg) agütsütsü lemtet, aser iba teyari agütsüba maparen nung yarisema tenla tolu agütsür tenüng meshi-i melitet nung itüm lenirtem dang ozü yimteni pelaba lemsateper.

**Tenla agütsürtem:-**

- Dr. M. Chuba Imsong
- Shri. Nuklutoshi Ex.Minister
- Dr. Moa Walling
- Mr. & Mrs. M. Temjen Longchar, Project Director
- Shri. Jemti Ao
- Dr. Lima
- Dr. L. Temsü Jamir
- Shri. I Nungsang Jamir
- Shri. I Toshitsungba Aier, Retired DG Home Guard
- Shri. N. Pangjung Jamir
- Dimapur Area Ao Baptist Churches & Dimapur Based Ao Civil Societies.

Tenla agütsür lokdi aser kibongtem maneni mapa tajung asoshi Tsüngremi moajangma.

**Sd/-  
N. Pangjung Jamir  
President, CAST**

**Sd/-  
B. Meren Tzudir  
Secretary, CAST**

**Russia-i Canada nunger ketdangsür 9 nem tenokdangba agütsü**

**Moscow, Aami/June 8** (Agencies): Russia-i Hombarnü Canada nunger ketdangsür tekü nem tenokdangba agütsüogo. Russia nung opposition lenir Alexei Navalny tepuokdak ayuba nung shilem agiba Russia nunger ketdangsürtem nem Canada-i tenokdangba agütsüba anema iba jenjang agi.

Russian Foreign Ministry sangdong ka ajanga, mapang telatet ka makai Russia-i aittsü memelaba Canada nunger ketdangsürtem rongnung Canada justice minister aser attorney general David Lametti, Canada police commissioner Brenda Lucki, aser Correctional Service commissioner Anne Kelly densema lir ta metetdaksü.

Tenokdangba agütsür

alirtem rongnung ano minister for intergovernmental affairs Dominic LeBlanc, Canadian Prime Minister Justin Trudeau indang policy director Marci Surkes, national defense department deputy minister Jody Thomas, Canadian armed forces Lt. Gen. Mike Rouleau, military intelligence command Rear Adm. Scott Bishop aser deputy police commissioner Brian Brennan nungera densema lir.

Taoba mapang Moscow-i US aser Europe nungi ketdangsürtem nem Russia-i maittsü atema tenokdangba agütsüba sülen tang Canada nunger ketdangsürtem nem kasa tenokdangba agütsüogo.

Navalny, shiba Russia tir Vladimir Putin anemer tulutiba lir, pa Germany nungi meyipa aruba sülen January ita

tepuokdak ayu. Pa temang nung mim agi timtem agütsüba sülen Germany nung ita pongu temang anepalua liasü, koba pai Kremlin dak tai tongloktsüogo, ajisüaka Russia nunger ketdangsürtemi magizüker. European lab tem nung Navalny nem mim agütsü, ta kuli tejangja ngutetogo.

February ita Navalny, küm anaser tesadang tepuokdak ayutsü obendanga agütsü. Pa Germany nung oa temang anepaluba mapang tetuyuba kar sülen manidakba atema aija tepuokdaka yok.

Navalny tepuokdak ayuba aser Russia nung pa chiochtsü khanga longkak aitba tashiyim agi azüoktsü merangba atema US aser EU-i aitsüba Russia-i magizüker aser ashiba agi, iba ken o ya telung ken o ka lir.

**Alima nung tongtipang website tem timtem ajuru**

**London, Aami/June 08** (Agencies): Financial Times, CNN aser Bloomberg News densema alima nung osangbener temi amshiba website aika Mongulbarnü timtem ajurua liasü.

Qatar nung amenoka aliba Al Jazeera Media Network nunga kongshi. France indang Le Monde osangkeket indang website nunga anepdang 10:00 (GMT) ako meta timtem ajuruba sayua liasü.

Ano Amazon.com Inc indang retail website nunga timtem ajuru amai liasü. Saka Amazon-i osang sangdonga mali.

Britain indang Guardian osangkeket ajanga ashiba agi, par website aser app nunga kongshi. Ano British news media indang site kar melapokteti liasü.

UK sorkar indang website tongtipa nunga timtem ajuru. White House indang website

nunga 'error message' liasü saka mapang tatsüka lir mapa shidak inyaka akum.

BBC aser The New York Times nungeria khen lapoka mamshiteti liasü, saka mapang tatsüka lir jungadok.

"Error 503 Service Unavailable" aser "connection failure" amala message tem sayua liasü. Website tem nung kongshiba timtem ya iba osang züluba mapang tashinung mejangjateti liasü.

San Francisco nung amenoka aliba cloud service company Fastly, koba media outlets aikati amshir, parnokia anepdang 10:00 (GMT) ako atongtsü lia timtem ajuruba indang shia liasü. Iba timtem maneni bushisingdang, ta parnokia website nung anaben tashi sangdonga liasü.

Ghonda ka shi lir, "Timtem jangjatetogo aser yangluogo. Alima ajunga nung services meyipa aruba mapang customer

temi origin load tali ajangshitsü," ta company ajanga ashi.

Website aika anepdang 11:00 (GMT) ako tashinung akhi ama tanem tanemi tajungba kuma liasü.

CNN.com lapoktsü merangertemi website nung "Fastly error: unknown domain: cnn.com" ta ashiba angu.

"Fastly nung timtem ajuruba ajanga nü indang service nung kongshir alitsü südi," ta Down Detector ajanga ashi, kobai internet aoba tsüngsü apur.

Fastly-i parnok ya "edge cloud platform" ta ashir. Parnoki tongtipang website aika nem 'behind-the-scenes cloud computing services' agütsür.

Reddit amshir 21,000 jungnüai social media amshidang timtem ajuruba shia liasü, aser Amazon amshira nisung 2,000 dak temai timtem ajurua liasü, ta Downtdetector.com ajanga ashi.

**China nung ASEAN foreign minister tem senden amen**

**Beijing, Aami/June 8** (Agencies): China-i, Southeast Asian linüktem nem maneni Covid-19 vaccine agütsütsü aser vaccine bushitsüngdangba nung teka amteper inyaksü nangzükogo. South China Sea nung tawa Philippines aser Malaysia den mangatetep adoker aliba mapang US anema nokdaksü asoshi Southeast Asian linüktem den tesendaktep yanglutsü atema China-i merangdangdar.

Hombarnü Chongqing nung Southeast Asian linüktem nungi foreign minister tem senden amenba mapang state councillor aser foreign minister Wang Yi-i linük balala nungi minister tem dang, China-i tang tashi nung linük balala nem Covid vaccine million 100 aser wara mapang

amshiba oset aser mozü balala agütsüogo, ta ashi.

"China-i maneni nungdakba apir vaccine tali agütsütsü aser vaccine bushitsüngdang, yangluba, alizükba, agütsüba aser achaayangba nung teka amteper inyaksü," ta Wang-i ashiba Xinhua news agency sangdong ka ajanga metetdaksü.

Wang-isa, China-i China-Asean "Public Health Cooperation Initiative" benoktsü aser Asean "Emergency Medical Materials Reserve" nongita yariba den regional public health capacity-building tashi taitba kuma yangertsü atema nongita yaritsü ta ashi.

"Wara takaratiba nung azüoktsü atema China-i Asean

den teka amteper inyaksü," ta Wang-i ashi.

Asean züngsemtem rongnung Brunei, Cambodia, Indonesia, Laos, Malaysia, Myanmar, Philippines, Singapore, Thailand aser Vietnam densema lir.

Wang-isa, Regional Comprehensive Economic Partnership (RCEP) takaratiba nung benoka inyaksü ayongzükogo, koba China, Asean linüktem, Japan, South Korea, Australia aser New Zealand tsüngda taoba küm November ita sign sütepa liasü.

Asean linüktemi RCEP benoktsü atema takaratiba nung temelaba agütsütsü atema imlaba lemsatepba den iba sentong takaratiba nung benoka inyaksü, Wang-i ayongzük.

## MULUNGNEN 'O'



ASO:  
09.03.1977

ASÜ:  
29.05.2021

Lt. Markaba Chuchuyimlang

Meimlaba mapang ka nung onoki teti meima aliba kinungbo aser Tsürabur Markaba pa asüba anogo nung kija, kibong, arogo, yimten, kiyongertem, medemertem, lokti balala aser temeimer shirnokisa ozü den sarasadem, nübo, rongsen, aser shisatsü agi yaritepogo nenok ajak dang ozü molung taroktiba nungi kanga pelaba lemsateper.

Asen Teyanglur Tsüngremi nenok mapa tajung meyiba moatsütsü onok sarasadem.

*Temeim Kinungtsü, Chirnur aser Kinungertem.*

## Mulungnen O



03/05/1930 - 29/05/2021

*Lar chirnur saker aser la dang temoatsü ta ajar; La kinungboia la sanga ashir; "Tetsür aikati temsüa inyakogo; saka nai parnok ajak ajatetogo" Apijemtsü Shin 31:28-29*

Temeim agi sünga aliba aküm taket tetsü ka, **TEMJENSANGLA PONGEN** (Mangmetong) May 29, 2021, 1 pm nung Kibubai kidangi jaogo. La onok den meliaka, la tamang senmang onok den teti alitsü. Onoki la mamatsü.

Ojala ajungbena sür onok mangyima alidang arogotem, lokti tentettem, medemertem, kiyongertem, kinungertem aser temeimertem kwikati sarasadem den temeim mapa agi ozü tejashi lemsatepogo, nenok ajak dang kanga pelar. Temeim aser Tajungsang Tsüngremi nenok ajak moajang ta sarasadem.

*~ Chirnurtem, anük-apang, semchirtem, aser kinungertem.*

## Yash Raj Films-i vaccination drive tenzüktsüogo

**New Delhi, Aami/June 08, 2021 (Agencies):** Bollywood nung nungtugu production company, Yash Raj Films-i Mongolbarnü vaccination drive indang mezüng shilem tenzüktsüogo. Hindi film industry nung inyaker nisung 4000 tashi nem vaccine agütsütsü nükjidong nung iba tentet ajanga vaccination drive tenzükja liasü.

Yash Raj Films (YRF)-i Federation of Western India Cine Employees (FWICE) nung züngsema alir 30,000 tashi nem vaccine agütsütsü nangzükogo. FWICE nung register süa alir züngsem lakh 2.5 tashi lir.

Iba vaccination drive ya YRF studio tem nung achaayanga agidar.

Yash Raj Films, Senior Vice President, Akshaye Widhani-ashi agi, FWICE züngsemtem atema iba vaccination drive tenzüktsü maongka anguba asoshi pelar. Iba mapatong ajanga industry nung maparen tanaben

tenzükshitsü asoshi nungitsü, koba alima ajunga asüngba coronavirus wara ajanga iba wadang nung kanga mejungi kongshiogo.

"Iba vaccination drive ajanga onok Industry nung anogoshia ayangertem pei mapai tanaben arutsü aser iba den külemi parnok kibong mesütsü asoshi sen aazüktsü leman lapoktsütsü. Industry nung züngsem ajunga ayimjema vaccine agütsütsü sentong lir asünung, iba vaccination drive sentong ya shilem balala lemsar agitsü," ta sangdong ka ajanga Widhani-i metetdaksü.

YRF-i ashiba agi, iba drive mezüng shilem nung, tajemba agia nisung 3500 nungi 4000 tashi ayimjema vaccine agütsütsü sentong lir.

Aditya Chopra-i aniba company nung inyakerterem taoba drive mapang parnok ajak nem Covid-19 vaccine agütsüogo aser tang company indang crew züngsemtem nem vaccine agütsü tenzükogo.

Taküm April ita Maharashtra

Sorkari film dak sendakba maparen ajak anena atatsü tetuyuba magütsüdang, Shah Rukh Khan indang "Pathan", Salman Khan indang action film - "Tiger 3" aser period drama "Maharaja" densema YRF production aika inyaka liasü.

YRF dak alia, producer Sajid Nadiadwala-i pa indang Nadiadwala Grandson Entertainment industry nung inyaker nisung 500 dak tema aser par kibong tem atema vaccination drive ayonga agiogo.

Taoba hopta, Producers Guild of India (PGI), Indian film, television aser digital content producer indang tentet temi külem sendaktepa alir züngsem aser production crew tem atema vaccintion drive tenzüktsüogo.

Maneni, Indian Motion Picture Producers' Association (IMPPA) aser Screenwriters Association (SWA) nati parnok züngsemtem atema free vaccine drive sentong ayongzüktsü sangdongogo.



Kohima, Aami/June 08, 2021: Midland Ward telungtet nung alir nungdakba pur nem lema agütsütsü atema Mongolbarnü (08.06.2021) Kohima district administration ajanga Kalos Society Pfutsero-i agütsüba süngolembatem Midland ward Kohima-i agizükba mapang tangokba noksa ka yangi angur.

Office of the Aonokpu Senso Mungdang  
H.Q. Aonokpu : Nagaland

**MANGYIM O**

Aonokpu Senso rongnung tebu teti tajung, telok akhüm süa shisalen sayur nübu tajung ka **Wb. K. Imliyanger Jamir** aoksa iba lima toktsür oadokba ajanga senso ajaki mang ayimer.

Wb. K. Imliyanger Jamir, Aonokpu Senso Mungdang nung lenir tajung ka liasü. Nagaland sorkar kübok Nagaland Sugar Mill aser Tuli Paper Mill nung Executive jenjang balala nung tenzük aruba nübu tajung ka, asangwa nungi senso nungdaktem aika nung tongti shilem agia yaritetba taküm ka liasü. Tanü telok nung nükdang rongnung ka, akümdong aser tsürabur tajung ka aliba mapang ajungbena arishi tatem kati aruogo!

Pa nem Teyangluri sempet tajung aika agütsü, item ajanga senso yaribatem teti atema mesamai otsü nung alitsü. Tanü senso lenir tajung ka melii aküm nung takoksa tulu ajurua kanga sasa bilemer.

Tulusang Tsüngremi pai toktsüba temeim kinungtsü, chirnurtem aser kinungertem ajak nem tesünep agüjangma.

Sd/-

L. Akümba Longchar, President

Sd/-

L. Rongsentemsü Jamir

## Pelaba Lemsateper



Onoki teti meima aliba **Asür P. Limatemsü**, 30th May 2021 alima nungi piladang Kinungertem, Medemertem, Kiyongertem aser Nükmen Baptist Arogo Darogapathar nung Sannükéri anir tenzükertem, ano talisa CIHSR nung Doctors aser Staff ajaki onok mangyim jashi ajak nung Sarasadem, Nübo, Shisatsü aser Rongsen ajak agi nungita yaritepogo, nenok ajak dang pelaba lemsateper.

Nenok dangi tsüngdong arua pelar ta meshitetba atema sasa bilemer. Tsüngremi nenok Kibong, Taküm Moajangma.

*~ Temeim Kinungtsü, Jabaso aser Kinungertem.*

## Sunil Chhetri-i alizüing tasen ka tongtetogo



**Doha, Aami/June 08, 2021 (Agencies):** Indian football

nung tongti asayar Sunil Chhetri-i international football goal timtiba idaktsür rongnung asayar tanabuba akümtsü asoshi pai goal 74 tashi tongteta Argentina nunger superstar Lionel Messi ajangetogo.

Hombar aonung 2022 FIFA World Cup aser 2023 AFC Asian Cup atema India aser Bangladesh tsüingda joint preliminary qualifying-round match asayadang, arishi küm 36 tain Chhetri-i iba alizüing tongtet.

Striker asayasang Chhetri teyari ajanga India-i goal 2-0 agi Bangladesh akok, koba küm trok nung parnoki World Cup qualifier asaya mezüing akoker alitsü.

Tang, international goal timtiba idaktsür rongnung Chhetri tejakdang Portugal nunger Cristiano Ronaldo (Goal 103) mezüing jenjang nung lir.

International asaya nung Chhetri goal 2 agi Barcelona star Messi aser goal 1 agi UAE nungi Ali Mabkhout tejakdang kümogo. Ali-i goal 73 idakja lir.

Taoba hopta, Chile aser Argentina tsüingda World Cup qualifier asayaba mapang, Messi-i international goal 72buba idaktsü. Kasa mapang, UAE aser Malaysia asayadang,

Mabkhout-i alizüing tasen tongtet.

Hombar, Jassim Bin Hamad Stadium nung asayaba mapang, minute 79buba nung, Ashique Kuruniyan-i metsü keta yokba cross ball ka Chhetri kolak agi tongokja goal idaktsü. Iba sülen, asaya temer mapang talila apuloktsür asayaba mapang, Chhetri-isa India atema goal tanabuba idakja liasü.

Ano külen, 'World football's all-time top-10' tongtettsü atema India captain-i goal ka dang nungdaker. Tang, Chhetri ya goal kati Hungary nunger Sandor Kocsis, Japan nunger Kunishige Kamamoto aser Kuwait nunger Bashar Abdullah tesülen alitsü. Par asempronglai gaol 75 (75 each) idakja lir.

Team pur takok tulu den Chhetri indang record ngua pelateper, ta asaya akokba atema All India Football Federation (AIFF) president Praful Patel-i Chhetri nem tenüingsang agütsüba mapang lemsatsep.

"Goal 74 den Lionel Messi ajangettsüsa international asayar rongnung goal timtiba idaktsür asayar tanabuba kuma @Indian Football skipper Sunil Chhetri-i alizüing tasen ka tongtetogo. Captain Fantastic (Chhetri) nem tenüingsang

agütsür aser tarutsü nunga pai takok angutsü imlaa atar," ta Twitter ajanga Patel-i lemsatsep.

Chhetri asalentong ajungba ajanga team-i iba asaya koktet, ta AIFF Chairman, Patel-isa ashi.

"Tanü Bangladesh madak takok anguba ajanga #BlueTigers nem tenüingsang agütsür aser skipper @chetrisunil111 tasa tajung ajanga team puri junga asaya tenzüik aser ibajagi takok tulu ngudaktsü. Nai meranga inyakba aser temulungtetba tulu aliba nü asaya yimya ajanga kuli süogo. Taruba asayatem nunga nai maneni takok tajung nguyonga aotsü imlaa atar," ta Patel-i tweet tanga ka nung lemsatsep.

Küm aika sülen, World Cup qualifying campaign nung India-i mezüing takok angur alitsü. Iba den külemi Chhetri indang goal ana ajanga par teloki iba asaya koktettsü maongka angu. Ano külen, küm 20 nung bendanglen ayongba World Cup qualifiers nung India Football team indang mezüing takok alitsü.

Iba takok densema, Group E nung India tasembuba jenjang tongtetogo. India team-i asaya tenet nungi point trok nguteta lir.

Kasa qualifier nung, India team-i June 15, 2021 nü Afghanistan den asayatsü.

World Cup 2022 atema qualify asütsü mechi India team pur teimla mali, saka parnoki meranga dang asayara, China nung Asian Cup asayamung nung shilem agitsü asoshi maongka angutsü akok.

## India-Sri Lanka series Colombo nung asayatsü

**Mumbai, Aami/June 08, 2021 (Agencies):** July nung India aser Sri Lanka na tsüingda asayatsü aliba limited overs indang match ajak Colombo kübok R Premadasa Stadium nung asayatsü.

Hombarnü, broadcaster Sony ajanga, July 13 nungi 25 tsüingda India-i Sri Lanka nung ODIs asem aser T20 International asayatsü sentong lir, ta sangoktsüogo.

Iba Tour atema Selector temi Shikhar Dhawan, Hardik Pandya mesüra Shreyas Iyer nunger tawabangba kübok asayar tajung aika densema züingsem 24 team ka shimtsü asalentong yangludat. Team ana tsüingda ODIs asem July 13, 16 aser 18 nü asayatsü; iba sülen July 21, 23 aser 25 nü T20Is asayatsü renema lir.

India-i mapang ka nung dang linük balalai squad balala yoktsü terenemba lir. July tom nung, Virat Kohli-i aniba Test team pur England den Test series pungo asayatsü atema renemtsü. Kasa mapang, India indang white-ball team pur Sri Lanka Tour nung shilem agitsü.

New Zealand den World Test Championships final asayatsü atema India indang Test squad pur UK nung lir. Iba WTC final ya June 18 nungi asayatsü aser iba sülen August 4 nungi England series tenzüiktsü.

Tanga sangdong ka ajanga angazükba agi, Sri Lanka Cricket (SLC) aser national asayatem tsüingda maparen kar nung mangatetepi aruba

mapang, cricketer temi contract magii England tour nung shilem agitsü mulungtetogo.

SLC tentet ajanga asayatem dang England tour temer sülen Sri Lanka-i arudang parnok asaya jenjang nübur dang metetdaksütsü nangzükba sülen, iba maparen ataloker alitsü.

Iba contract maparen tsütsü Sri Lanka cricket asayatem kanga memulung, kechiyong iba maparen nung ochimashi dena aliba den senior player tem nem sen tagütsütsü tim shitak magütsür ama bilemer.

"Iba maparen dak sendakba nung asayatem ochi inyakyim sayutsü mepishiogo," ta Nishan Premathiratne-i ashi.

"Parnoki (asayatem) contract ka nung dang sign mesüi iba Tour nung shilem agitsü. Asayatem molungsoa iba inyakyim nung anidaktsü züingzüktepogo, saka iba atema asayar nem taa/temenok ka agütsütsü kecha mali. Sri Lanka atema parnoki teti dang bendanga agüja asaya arudar," ta pai shisem.

Sri Lanka cricket asayar 38 tashi iba Tour contact nung sign masütsü atema tenangzüktep agiogo aser taoba mapang iba scheme tasen nung adentsü memulunger asayar 24 nungi asayar timba akümer alitsü.

Sri Lanka team pur Mongolbar nikongdang England-i ayamesoa ogo. June 23, 2021 nungi tenzüka parnoki T20Is aser ODIs asemsem asayatsü.

## Euro 2020: Poland squad nungi Milik tukadok

**New Delhi, Aami/June 08, 2021 (Agencies):** Poland national team nungi forward asayasang, Arkadiusz Milik temekok yiruba ajanga squad nungi tukadokba sülen, pai Euro 2020 nung shilem magitsü

lemtet, ta Polish Football Association sangdong ka ajanga osang jangjatsüogo.

Taküm May ita tatemlen FC Metz den iba season indang Ligue 1 match tatembuba asayaba mapang, Olympique Marseille nungi forward asayar Milik temekok abilen yirua liasü. Iba mapang nungi, Milik-i training nung khen danga dena mali.

"Arishi küm 27 tain Milik, shibai striker shilem asayar, pa temekok yiruba ajanga Opalenica kübok Polish national team training camp nunga shilem magitet aser item timtem ajak asadanga iba asayamung nungi pa agienogo," ta Polish FA sangdong ka ajanga metetdaksü.

June 14, 2021 nü Group E nung Poland-i Slovakia den asayatsü renema aliba mapang ka, training nung shilem agidaktsütsü nükjidong yur,

tesüiba hopta ana nungi Milik temang anepalua arudar.

Ajisüaka, Milik par club nung adentsü atema, Hombar aonung pai Poland indang training camp toktsür oadok, kong pa timtem anepalutsü asoshi mera kar agitsü.

Milik, shibai asaya 70 tashi takok angu, pa melena asayar tanga manioktsü lemtet, ta Polish FA-i shisem.

"Training agiba mapang pa temang nung timtem ajanga kangshiba aser mapang shia pa temang tendangba sülen, iba timtem ajanga pai training nung shilem agitsü aser match tem asayatsü asoshi nokdang," ta sangdong nung shia lir.

"Rehabilitation nung amung yongjia, UEFA Euro 2020 nung temulung lema shilem agitsü asoshi temang agi menangzüktsü Milik-i shiogo," ta kasa sangdong ajanga metetdaksü.



Budapest, Aami/June 08, 2021: Papp Laszlo Budapest Sports Arena kübok ayonga agiba World Judo Championships asayamung - tetsür 52kg category tetoktepba nung gold medal angur Japan tsür Ai Shishime (abilen nungi tanabuba), silver medal angur Spain tsür Ana Perez Box (abilen), bronze medal angur Switzerland nungi Fabianne Kocher aser Israel tsür Gefen Primo (achiji) nungeri pei pei medal amer tangokba noksa ka yangi angur.

## BILEMDANGANG

"Temoatsü ajak pei yari agizüker."